

Compania madre na San Diego no ta interesa mas den Aruba

Aruba Grand Resort & Casino a pone beslag riba Merengue Casino



ORANJESTAD(AAN) -- Aruba Grand Resort & Casino a pone beslag ayer mainta riba Merengue Casino pasobra operadornan di e casino debe e hotel un cantidad di placa di huur. E compania madre na San Diego "Thunderbird Gaming" a laga sa cu nan no ta interesa mas den Aruba ya cu nan ta sufriendo hopi perdida. Na Panama nan a habri diferente casino cu ta un exito y ta creciendo. Door di e beslag riba Merengue Casino tin 35 trahador cu di un dia pa otro no tin trabao mas.

Ayer mainta trahadornan di Merengue Casino a haya nan confronta cu un situacion amargo ora nan a presenta na e trabao pa traha y constata cu e casino ta cera.

Nan a haya informacion cu Aruba Grand Resort & Casino a laga pone beslag riba Merengue Casino pasobra operadornan di e casino tin 6 luna sin paga huur. E trahadornan recientemente a afilia na sindicato F.T.A. cu siman pasa a presenta un proposicion pa e CAO nobo na e operadornan. Notabel ta cu e operadornan no a notifica e sindicato nada tocante e decision di e compania madre Thunderbird Gaming.

DIARIO a entrevista ayer tardi presidente di F.T.A., Rudy Geerman, kende a expresa di ta hopi preocupa cu e desaroyo cu casinonan na Aruba.

El a muestra cu di a 11 casinonan na Aruba, 6 a confronta problema. El a menciona cu tabatin problema na Wyndham, ainda no tin nada fijo cu Global Casino, e problema di

Royal Palm Casino, Grand Holiday Inn Casino cu a cera, La Cabana casino kier a kita un cantidad di trahador y awor beslag riba Merengue casino.

Geerman a señala cu tur e casinonan ariba menciona tin algo comun esta e management di hotel no ta opera e casino. E hotel ta huur e casino cu un operador y aparentemente nan no ta sinta hunto pa conhuntamente propa-

ganda e casino.

Geerman ta di opinion cu door di e desaroyo alarmante aki, a bira tempo pa gobierno bin cu leynan fuerte caminda operadornan di casino mester cumpli cu condicionnan stipula promer cu haya permiso pa opera e casino. No por permiti cu operadornan di casino ta cera casino y baha na awa manera nan ta haya ta bon. Mester tin un garantia cu si e operador dicidi di bay

mes, e trahadornan lo keda haya nan salario pa algun luna.

Ta asina cu e licencia di operacion di casino ta bisa cu no por laga e casino cera pa un cierto cantidad di dia. Rudy Geerman ta teme cu ta un wega lo bay hunga caminda lo bay reduci e cantidad di trahadornan cu ta traha den casino.

El a duna di conoce na DIARIO cu e trahadornan di Merengue Casino den e ultimo 4 añanan a conoce tres operador di casino y nan ta sospecha cu ta un wega asina lo bay sosode.

Pa loko ta trata e beslag, Rudy Geerman a bisa cu e no por suministra mucho informacion ya cu e abogado nan di Merengue y di Aruba Grand Resort and Casino no a sinta na mesa.

Geerman ta puntra, kico ta e motibo cu Merengue Casino a laga cos bay for di man asina. E kier sa si e operadornan no ta interesa mas den Aruba. Ta asina cu el a pone mediador di gobierno na altura di e situacion y ayera nochí el a

reuni cu e trahadornan di Merengue Casino.

Informacion cu DIARIO ta dispone di dje ta muestra cu Thunderbird Gaming na San Diego a cera diferente compania entre otro na South Carolina, Colorado y Canada.

Notabel ta cu Thunderbird Gaming a laga sa cu nan ta cabando cu nan operacion na Aruba pasobra nan a perde mas cu 2 Mijon Dollar Canades. Nan ta concentrando aworaki riba Panama caminda ya caba nan tin tres casino habri cu ta operando bao di e nomber Fiesta Casino. E casinonan aki ta creciendo y dentro di poco nan lo bay habri e di cuater. Tambe nan ta concentrando na Guatemala.

Esaki ta indica pues cu intencionalmente Merengue Casino a keda sin paga Aruba Grand Resort and Casino pa nan laga pone beslag y awor ta e trahadornan ta e victima. Ta di spera cu den transcurso di awe gobierno lo tuma e medidanan necesario pa siquiera e trahadornan por haya nan salario.

ROSEA CAYENTE!!

